

修行本起經卷上

尺一

後漢沙門竺大力共康孟祥譯

現變品第一

聞如是一時佛在迦維羅衛國釋氏精舍尼  
 拘陀樹下與大比丘衆千二百五十人俱皆  
 是阿羅漢已從先佛淨修梵行諸漏已盡意  
 解無垢衆智自在曉了諸法離於重擔逮得  
 所願三處已盡正解已解三神滿具六通已  
 達比丘尼衆大愛道等五百人不可計諸優  
 婆塞優婆夷四輩普具諸異學婆羅門尼犍

等不可計都悉來會一切諸四天王忉利天  
 王焰天王兜術天王尼摩羅提天王波羅尼  
 蜜天王梵天王乃至阿迦膩吒天王各與無  
 央數衆皆悉來會諸龍王阿須倫迦留羅  
 陀羅摩休勒一一尊神復尊各與眷屬皆悉  
 來會白淨王無怒王無怨王甘露淨王及迦  
 維羅衛九億長者各從官屬一時來會為佛  
 作禮却坐一面爾時佛放身三十二相八十  
 種好光明普照三千世界如月盛滿星中特  
 明威神堂堂衆聖中王一切衆會咸有疑心

各自念言太子生迦維羅衛長白淨王家棄國行學道成號佛為於樹下六年得道耶十二年得乎或復念言本行何術致斯巍巍所事何師今得特尊始修何法得成為佛佛知一切皆有疑意便告摩訶目犍連汝能為怛薩阿竭說本起乎於是目連即從座起前整衣服長跪叉手白佛言唯然世尊今當承佛威神持佛神力為一切故當廣說之佛言宿命無數劫時本為凡人初求佛道以來精神受形周徧五道一身死壞復受一身生死無

量譬喻盡天下草木斬以為籌計吾故身不能數矣夫極天地之始終謂之一劫而我更天地成壞者不可稱載也所以感傷世間會意長流沒於愛欲之海吾獨欲返其源故自勉而特出是以世世勤苦不以為勞虛心樂靜無為無欲損已布施至誠守戒謙卑忍辱勇猛精進一心思惟學聖智慧仁活天下悲窮傷厄慰沃憂感育養衆生救濟苦人承事諸佛別覺真人功勳累積不可得記至于昔者錠光佛興世有聖王號名燈盛治在提和

衛國人民長壽慈孝仁義地沃豐盛其世太平生一太子字為錠光聰明智達世之少雙聖王愛念甚奇甚異臨壽終時國付太子太子錠光念計無常傳國授弟即時出家行作沙門道成號佛無上至尊神德光明無晝無夜從比丘衆六十二萬遊行世界開化羣生當還提和衛國度脫種姓及國臣民與諸大衆遊詣本國是時國中百官羣臣謂佛大衆來攻奪國皆共議言今當與師逆往拒之不宜與國即時相率欲以向佛佛以六通逆照

其心化作大城高大嚴峻與彼城對佛哀國人欲令解脫即化二城變為瑠璃其城洞達內外相照復化六十二萬比丘如佛無異變化示現王見惶怖疑解心伏即出詣佛叩頭自悔稟性空頑惡意向佛愚人所誤幸惟原之願佛便還精舍七日之中當修所供奉迎二至尊佛知其意默然便還於是其王問羣臣曰奉迎聖王其法云何諸臣言迎遮迦越王法莊嚴國土面四十里平治道路香汁灑地金銀珍琦七寶欄楯起諸幢旛繒綵華蓋城

門街巷莊校嚴飾彈琴鼓樂如忉利天散華  
然燈燒衆名香敬侍道側七日已辦王勅羣  
臣百官導從躬親近佛佛哀人民告諸比丘  
嚴出應請比丘受教行詣本國佛告比丘汝  
等見此供設嚴好光目者不昔吾承事往古  
諸佛供養莊嚴亦如今也是時有梵志儒童  
名無垢光幼懷聰敏志大包弘隱居山林守  
玄行禪圖書祕識無所不知心思供養奉報  
師恩辭行開化道經丘聚聚中梵志名不樓  
陀盛祀大祠滿十二月飯食供養梵志徒衆

八萬四千人歲終達觀金銀珍寶車馬牛羊  
衣被繒綵履屣七寶之蓋錫杖澡盥最聰明  
智慧者應受斯物七日未竟時儒童菩薩入  
彼衆中論道說義七日七夜爾時其衆欣踊  
無量主人長者甚大歡喜以女賢意施與菩  
薩菩薩不受惟取傘蓋錫杖澡盥履屣金銀  
錢各一千還上本師其師歡喜便共分布儒  
童菩薩復辭出行時諸同學各各贈送人一  
銀錢遂行入國見人欣然忽忽平治道路灑  
掃燒香即問行人用何等故行人答曰銳光

佛今日當來施設供養儒童菩薩聞佛歡喜  
 踊躍衣毛肅然佛從何來云何供養行人對  
 曰惟持華香繒絲幢旛於是菩薩便行入城  
 勤求供具須臾周市了不可得國人言王禁  
 華香七日獨供養菩薩聞之心甚不樂須臾  
 佛到知童子心時有一女持瓶盛華佛放光  
 明徹照華瓶變為瑠璃內外相見菩薩往趣  
 而說頌曰  
 銀錢凡五百 請買五莖華 奉上錠光佛  
 求我本所願

女時說頌答菩薩言  
 此華直數錢 乃雇至五百 今求何等願  
 不惜銀錢寶 菩薩即答言  
 不求釋梵魔 四王轉輪聖 願我得成佛  
 度脫諸十方 女言善快哉 所願速得成  
 願我後世生 常當為君妻  
 菩薩即答言  
 女人多情態 壞人正道意 敗亂所求願  
 斷人布施心

女答菩薩言

女誓後世生

令佛知我意

此華便可得

觀視其本行

於是便可之歡喜受華去意甚大悅今我女

弱不能得前請寄二華以上於佛即時佛到

國王臣民長者居士眷屬圍繞數千百重菩薩

欲前散華不能得前佛知至意化地作泥

人衆兩披爾乃得前便散五華皆止空中變

隨君所施與

仁者慈愍我

不者錢還鄉

已更五百世

曾為菩薩妻

大悅今我女

佛即時佛到

菩薩

人衆

兒子及我身

惟賜求所願

即時思宿命

曾為菩薩妻

大悅今我女

佛即時佛到

菩薩

人衆

人衆

成華蓋面七十里二華住佛兩肩上如根生

菩薩歡喜布髮著地願尊蹈之佛言豈可蹈

乎菩薩對曰惟佛能蹈佛乃蹈之即住而笑

口中五色光出離口七尺分為兩分一光繞

佛三匝光照三千大千刹土莫不得所還從

頂入一光下入十八地獄苦痛一時得安諸

弟子白佛言佛不妄笑願說其意佛言汝等

見此童子不唯然已見世尊言此童子於無

數劫所學清淨降心棄命捨欲守空不起不

滅無猗之慈積德行願今得之矣佛告童子

汝却後百劫當得作佛名釋迦文能仁言如來  
 無所著至真等正覺劫名波陀此言世界名  
 沙椀父名白淨母名摩耶妻名裘夷子名羅  
 云侍者名阿難右面弟子名舍利弗左面弟  
 子名摩訶目犍連教化五濁世人度脫十方  
 當如我也於是能仁菩薩以得決言踊躍歡  
 喜疑解望止燿然無想寂而入定便逮清淨  
 不起法忍即時身踊懸在空中去地七仞從  
 上來下稽首佛足便作沙門佛說頌言  
 汝當於是世 把草坐樹下 戒忍定慧力

降伏魔官屬 汝行聖人場 打震甘露鼓  
 愍念衆生故 續轉無上輪 汝當於是世  
 善權無上慧 九十六外道 皆令得法眼  
 汝當於是世 慈哀行四恩 施慧法甘露  
 滅除三毒病  
 能仁菩薩承事大錠光至于泥洹奉戒清淨守  
 護正法慈悲喜護惠施仁愛利人等利救濟  
 不倦壽終上生兜術天上欲救一切攝度盲  
 冥從上來下為轉輪王飛行皇帝七寶導從  
 何等為七寶一金輪寶二神珠寶三玉女寶

四典寶藏臣五典兵臣六紺馬寶珠髦鬣七  
白象寶珠髮尾金輪寶者輪有千輻雕文刻  
鏤衆寶填厠光明洞達絕日月光當在王上  
王心有念輪則爲轉案行天下須臾周匝是  
故名爲金輪寶也神珠寶者至二十九日月  
盡夜時以珠懸於空中在其國上隨國大小  
明照内外如晝無異是故名爲神珠寶也玉  
女寶者其身冬則溫暖夏則清涼口中青蓮  
華香身栴檀香食自消化無大小便利之患  
亦無女人惡露不淨髮與身等不長不短不

白不黑不肥不瘦是以名爲玉女寶也典寶  
藏臣者王欲得金銀琉璃水精摩尼真珠珊  
瑚珍寶時舉手向地地出七寶向水水出七  
寶向山山出七寶向石石出七寶是故名爲  
典寶藏臣也典兵臣者王意欲得四種兵馬  
兵象兵車兵步兵臣白王言欲得幾種兵若  
千若萬若至無數顧視之間兵即已辦行陣  
嚴整是故名爲典兵臣也紺馬寶者馬紺青  
色髦鬣貫珠溫厚洗刷珠則墮落須臾之間  
更生如故其珠鮮潔有踰於前鳴聲于遠聞

一由旬王時乘騎案行天下朝去暮返亦不疲極馬脚觸塵皆成金沙是故名爲紺馬寶也白象寶者色白絕目七肢平跖力過百象髦尾貫珠旣鮮且潔口有六牙牙七寶色若王乘時一日之中周徧天下朝往暮返不勞不疲若行度水水不搖動足亦不濡是故名爲白象寶也爾時人民壽八萬四千歲後宮姝女各八萬四千王有千子仁慈勇武一人當千聖王治政戒德十善教授人民天下太平風雨順時五穀熟成食之少病味若甘露

氣力豐盛惟有七病一者寒二者熱三者飢四者渴五者大便六者小便七者意所欲聖王壽盡又昇梵天爲梵天王上爲天帝下爲聖主各三十六返終而復始欲度人故隨時而出菩薩勤苦經歷三阿僧祇劫垂欲愍傷一切輪轉無際爲衆生故投身餒餓勇猛精進超踰九劫能仁菩薩於九十一劫修道德學佛意行六度無極布施持戒忍辱精進一心智慧善權方便慈悲喜護養育衆生如視赤子承事諸佛積德無限累劫勤苦

通十地行在一生補處功成事就神智無量  
期運之至當下作佛於兜術天上興四種觀  
觀視土地觀視父母生何國中教化之宜先  
當度誰白淨王者是吾累世所生父拘利刹  
帝有二女時在後園池中澡浴菩薩舉手指  
言是吾世世所生母當往就生時有五百梵  
志皆有五神通飛過宮城不能得度驚而相  
語吾等神足石壁皆通因何等故今不得度  
梵志師言汝見此二女不一女當生三十二  
相大人一女當養三十二相大人是其威神

令吾等失神足是時音聲普聞天下是時白  
淨王歡喜踊躍貪得飛行皇帝來生其家即  
便求索娉迎爲妻迦夷衛者三千日月萬二  
千天地之中央也過去來今諸佛皆生此地  
菩薩降神品第二

於是能仁菩薩化乘白象來就母胎用四月  
八日夫人沐浴塗香著新衣畢小如安身夢  
見空中有乘白象光明悉照天下彈琴鼓樂  
弦歌之聲散華燒香來詣我上忽然不現夫  
人驚寤王即問曰何故驚動夫人言向於夢

中見乘白象者空中飛來彈琴鼓樂散華燒  
 香來在我上忽不復現是以驚覺王意恐懼  
 心為不樂便召相師隨若那占其所夢相師  
 言此夢者是王福慶聖神降胎故有是夢生  
 子處家當為轉輪飛行皇帝出家學道當得  
 作佛度脫十方王意歡喜於是夫人身意和  
 雅而說偈言  
 今我所懷胎 必是摩訶薩 姪邪嫉志止  
 身心清淨安 心常樂布施 持戒忍精進  
 定意入三昧 智慧廣度人 觀察大王身

敬如父以兄 瞻愍人民類 亦如己赤子  
 疾病醫藥療 飢寒施衣食 憐貧敬尊老  
 樂今生老滅 諸在獄閉繫 毒苦愁怖惱  
 願王加大慈 一時赦罪過 今我不欲聞  
 世俗音樂聲 志趣山林宴 清淨寂默定  
 於是粟散諸小國王聞大王夫人有娠皆來  
 朝賀各以金銀珍寶衣被華香敬心奉貢稱  
 吉無量夫人舉手攘之不欲勞煩自夫人懷  
 妊天獻衆味補益精氣自然飽滿不復饗王  
 廚十月已滿太子身成到四月八日夫人出

遊過流民樹下衆華開敷明星出時夫人攀樹枝便從右脅生墮地行七步舉手住而言天上天下惟我爲尊三界皆苦吾當安之應時天地大動三千大千刹土莫不大明釋梵四王與其官屬諸龍鬼神閱义捷陀羅阿須倫皆來侍衛有龍王兄弟一名迦羅二名鬱迦羅左雨溫水右雨冷泉釋梵摩持天衣裹之天雨華香彈琴鼓樂熏香燒香擣香澤香虛空側塞夫人抱太子乘交龍車幢旛伎樂導從還宮王聞太子生心懷喜踊即與大衆

百官羣臣梵志居士長者相師俱出往迎王馬足觸地五百伏藏一時發出海行興利於時集至梵志相師普稱萬歲即名太子號爲悉達此言王見釋梵四王諸天龍神彌滿空中敬心肅然不識下馬禮太子時未至城門路側神廟一國所崇梵志相師咸言宜將太子禮拜神像即抱入廟諸神形像皆悉顛覆梵志相師一切大衆皆言太子實神實妙威德感化天神歸命咸稱太子號天中天於是還宮天降瑞應三十有二一者地爲大動丘

墟皆平二者道巷自淨臭處更香三者國界  
枯樹皆生華葉四者苑園自然生奇甘果五  
者陸地生蓮華大如車輪六者地中伏藏悉  
自發出七者中藏寶物開現精明八者篋笥  
衣被披在椀架九者衆川萬流停注澄清十  
者風霽雲除空中清明十一者天爲四面細  
雨澤香十二者明月神珠懸於殿堂十三者  
宮中火燭爲不復用十四者日月星辰皆住  
不行十五者沸星下現侍太子生十六者天  
梵寶蓋彌覆宮上十七八方之神奉寶來獻

十八天百味飯自然在前十九寶甕萬口懸  
盛甘露二十天神牽七寶交露車至二十一  
五百白象子自然羅在殿前二十二五百白  
師子子從雪山出羅住城門二十三諸姝  
女現妓女肩天上二十四諸龍王女繞宮而住  
二十五天天萬玉女把孔雀尾拂現宮牆上二  
十六天諸玉女持金瓶盛香汁列住空中侍  
二十七天樂皆下同時俱作二十八地獄皆  
休毒痛不行二十九毒蟲隱伏吉鳥翔鳴三  
十漁獵怨惡一時慈心三十一境內孕婦生

者悉男聾盲瘖瘂癱殘百病皆悉除愈三十  
二樹神人現低首禮侍當此之時十六大國  
莫不雅竒歎未曾有於是香山有道士名阿  
夷中夜覺天地大動觀見光明輝赫於常山  
中有華華名優曇鉢華中自然生師子主墮  
地便行七步舉頭而吼面四十里其中飛鳥  
走獸蛸飛蚊行蠕動之類莫不攝伏阿夷念  
言世間有佛應現此瑞今世五濁盛惡何故  
有此吉祥瑞應天曉飛到迦夷衛國未及國  
城四十里外忽然落地心甚驚喜此必有佛

於我無疑步詣宮門門監白王阿夷在門王  
愕然曰阿夷常飛今者何故在門求通王即  
出禮拜迎澡洗沐浴施新衣服問訊今日臨  
顧勞屈尊聖阿夷荅曰聞大王夫人生太子  
故來瞻省勅其內人抱太子出侍女白言太  
子疲懈始得安眠阿夷喜悅便說偈言  
人雄常自覺 覺諸不覺者 歷劫無睡卧  
豈當眠寐乎  
於是侍女抱太子出欲以太子向阿夷禮阿  
夷便驚起前禮太子足國王及羣臣見國師

阿夷敬禮太子心便悚然益知至尊即皆頭  
面禮太子足阿夷猛力迴伏百壯士方抱太  
子筋骨委震見奇相三十二八十種好身如  
金剛殊妙難量悉如祕識必當成佛於我無  
疑淚下哽噎悲不能言時王惶怖請問太子  
有不祥乎吉尺一願告幸勿有難阿夷十二自抑制  
即便說偈言

今生大聖人 除世諸灾患 傷我自無福  
七日當命終 不見神變化 說法雨世間  
今與太子別 是故自悲泣 太子舉手言

五道十方人 吾當盡教化 皆令得其所  
我本意所願 當度薩和薩 一人不得道  
吾不入泥洹  
於是阿夷喜重禮太子足白淨王怖止歡喜  
即說偈言

太子有何相 當何治於世 願為一一說  
諸相有何福  
時阿夷以偈答王言  
今觀太子身 金色堅固志 無上金剛杵  
春破姪欲山 大人相滿具 足下安平正

居國當平治

出家等正覺

手足輪相現

頰車如師子

四牙萬字現

佛德現天下

其好有千輻

是故轉法輪

得佛三界尊

是故豐三世

味味次第味

所食識其味

鹿脯而龍髀

隱相陰馬藏

觀者無有馱

是故設法味

施與於一切

廣舌如蓮華

是故法清淨

纖長手臂指

軟掌縵中裏

出口覆其面

是故種種音

受者如甘露

是故法久長

千歲在世教

皮毛柔軟細

語聲哀鸞音

誦經過梵天

是故說法時

右旋不受塵

金色鈎鎖骨

是故伏外道

身安意得定

眼相紺青色

世世慈心觀

方身師子臆

旋轉不阿曲

平住手過膝

是故天人類

視佛無有馱

頂特生肉髻

是故一切禮

身有七處滿

千子力當敵

髮色紺瑠璃

欲度一切故

是故法隆盛

菩薩宿作行

是故無怨惡

口含四十齒

面光如月滿

色像華初開

是以眉間毫

方白而齊平

甘露法率衆

是故有七寶

白淨如明珠

於是王深知其能相為起四時殿春秋冬夏各自異處其殿前列種甘果樹樹間七寶池池中奇華色色各異譬如天華水類之鳥數十百種宮城牢固七寶樓觀懸鈴幢幡門戶開閉聲聞四十里選五百妓女擇取溫雅禮儀備者供養娛樂育養太子太子生日國中八萬四千長者生子悉男八萬四千廐馬生駒其一特異毛色絕白髦鬣貫珠以是之故名之為蹇特廐生白象八萬四千其一白象七肢平跽髦鬣貫珠口有六牙是故名為白

象之寶白馬給乘奴名車匿太子生七日其母命終以懷天師功福大故生忉利天封受自然太子在宮不樂憤鬧志思閑燕王問侍女太子樂乎侍女白言供養妓樂不失時節觀省太子不以歡樂王用愁憂尺一即召羣臣阿夷相言必成佛道以何方便使太子留令無道意有一臣言惟教書疏用繫志意即與其僕五百人俱共詣師門師聞太子至即出拜迎太子問言此為何人臣言是國教書師也太子問言閻浮提書凡有六十四種即數書

名今用何書以相教示梵志惶怖答太子言  
六十四種已所未聞惟持二書以教人民即  
時歸命願赦不及

試藝品第三

於是太子與諸官屬即迴還宮至年十七妙  
才益顯晝夜憂思未曾歡樂常念出家王問  
其僕太子云何其僕答言太子日日憂悴未  
嘗歡樂王復愁憂召諸羣臣太子憂思今當  
如何有一臣言令習兵馬或言當習手搏射  
御或言當令案行國界使觀施為散其意思

有一臣言太子已大宜當妻娶以迴其志王  
為太子採擇名女無可意者有小國王名須  
波佛此言善覺有女名裘夷端正皎潔天下少雙  
八國諸王皆為子求悉不與之白淨王聞即  
召善覺而告之曰吾為太子聘取卿女善覺  
答言今女有母及諸羣臣國師梵志當卜所  
宜別自啓白善覺歸國愁憂不樂絕不飲食  
女即問王體力不安何故不樂父言生汝令  
吾憂耳女言云何為我父言聞諸國王來求  
索汝吾皆不許今白淨王為太子求汝若不

許者恐見誅罰適欲與者諸國怨結以是之  
故今吾憂感女言願父安意此事易耳我却  
七日自處出門善覺聽之表白淨王女却七  
日自求出處國中勇武技術最多者爾乃爲  
之白淨王念太子處宮未曾所習今欲試藝  
當如何乎至其時日裘夷從五百侍女詣國  
門上諸國術士普皆雲集觀最妙技禮樂備  
者我乃應之王勅羣臣當出戲場觀諸技術  
王語優陀汝告太子爲爾娶妻當現奇藝優  
陀受教往告太子王爲娶妻今試禮樂宜就

戲場太子即與優陀難陀調達阿難等五百  
人執持禮樂射藝之具當出城門安置一象  
當其城門決有力者調達先出見象塞門以  
之一拳應時即死難陀尋至牽著道側太子  
後來問其僕曰誰枉殺象答言調達殺之誰  
復移者答言難陀菩薩慈仁徐前按象舉擲  
城外象即還甦更生如故調達到場撲衆力  
士莫能當者諸名勇力皆爲摧辱王問其僕  
誰爲勝者答言調達王告難陀汝與調達二  
人相撲難陀受教即撲調達頓躡悶絕以水

灌之斯須乃甦王復問言誰爲勝者其僕答  
言難陀得勝王告難陀與太子決難陀白王  
兄如須彌難陀如芥子實非其類拜謝而退  
復以射決先安鐵鼓十里置一至于七鼓諸  
名射者其箭力勢不及一鼓調達放發徹一  
中二難陀徹二箭貫三鼓其餘藝士無能及  
者太子前射挽弓皆折無可手者王告其僕  
曰吾先祖有弓今在天廟汝取持來即往取  
弓二人乃勝令與衆人無能舉者太子張弓  
弓聲如雷傳與大衆莫能引者太子攬弓牽

彈弓之聲聞四十里彎弓放箭徹過七鼓再  
發穿鼓入地泉水踊出三發貫鼓著鐵圍山  
一切衆會歎未曾有諸來決藝悉皆受折慚  
辱而去復有力人王最於後來壯健非常勇  
猛絕世謂調達難陀爲不足擊當與太子共  
決技耳被辱去者審呼能報踊躍歡喜語力  
人王卿之雄傑世無當者決力取勝必自如  
意皆隨後還觀與太子決於勝負調達難陀  
奮其威武便前欲擊太子止言此非爲人大  
力魔王耳卿不能制必受其辱善自當之父

王聞此念太子幼深為愁怖諸來觀者謂勝太子時力人王踏地勇起奮臂舉手前撮太子太子應時接撲著地地為大動眾會重辱散去忽滅太子殊勝椎鍾擊鼓彈琴歌頌騎乘還宮優陀語善覺言太子技藝事事殊特十七卿女裘夷今為所在善覺答言從五百女在城門上優陀白太子言宜現奇特太子脫身珠璣欲遙擲之優陀言眾女大多今擲與誰太子言珠璣著頸則是其人尋便擲珠即著裘夷一切眾女皆稱妙哉甚為殊特世之希

有於是善覺嚴辦送女詣太子宮眾妓侍從凡二萬人晝夜娛樂絕世之音太子志意不以為歡常欲棄捨靜修道業濟度眾生王問其僕太子迎妃以來意趣云何僕答王言憂思不樂身體羸瘦轉不如前王心愁憂即召羣臣太子不悅當如之何諸臣議言宜復娉娶增其妓樂儻能迴志樂於世間即復為娉妙女一名眾稱味二名常樂意其一夫人者二萬姝女三夫人者凡有六萬姝女端正妙好天女無異王問裘夷等太子今有六萬姝



修行本起經卷下

尺二

後漢沙門竺大力共康孟祥譯

遊觀品第四

於是王告太子當行遊觀太子念言久在深  
宮思欲出遊審得所願王勅國中太子當出  
嚴整道巷灑掃燒香懸繒幡蓋務令鮮潔太  
子導從千乘萬騎始出東城門時首陀會天  
名難提和羅欲令太子速疾出家救濟十方  
三毒火然願雨法水以滅毒火難提和羅化  
作老人踞於道傍頭白齒落皮緩面皺肉消

脊偻肢節萎曲眼淚鼻涕涎出相屬上氣喘  
息身色黧黑頭手頰掉軀體顫懾惡露自出  
坐臥其上太子問言此為何人天神寤僕僕  
言老人何等為老曰夫老者年者根熟形變  
色衰氣微力竭食不消化骨節欲離坐臥須  
人目瞋耳聾迴旋即忘言輒悲哀餘命無幾  
故謂之老太子歎曰人生於世有此老患愚  
人貪愛何可樂者物生於春秋冬悴枯老至  
如電身安足恃即說偈言  
老則色衰病無光澤皮緩肌縮死命近促

老則形變喻如故車法能除苦宜以刀學  
命欲日夜盡及時可勤力世間諦非常  
莫惑墮冥中當學然意燈自練求智慧  
離垢勿染汙執燭觀道地  
於是太子即迴車還愍傷一切有此大患憂  
思不樂王問其僕太子出遊何故速還其僕  
答言道逢老人傷念不樂還宮愁思數年小  
差復欲出遊王勅國中太子當出禁諸臭穢  
莫在道側於是太子駕乘出南城門天化為  
病人在于道側身瘦腹大軀體黃熟效嗽嘔

逆百節痛毒九孔敗漏不淨自流目不見色  
耳不聞聲呻吟呼吸手足摸空喚呼父母悲  
戀妻子太子問曰此為何等其僕答言病人  
也何等為病答言人有四大地水火風一大  
有百一病展轉相鑽四百四病同時俱作此  
人必以極寒極熱極飢極飽極飲極渴時節  
失所臥起無常故致斯病太子歎曰吾處富  
貴極世所珍飲食快口放心自恣淫於五欲  
不能自覺亦當有病與彼何異即說偈言  
是身為脆哉常俱四大中九孔不淨漏

有老有病患 生天皆無常 人間老病憂

觀身如雨泡 世間何可樂

於是太子迴車還宮思念一切有此大患王  
問其僕太子出遊今者何如其僕答言逢見  
病人於是不樂數年小差復欲出遊王勅國  
中太子當出平治臭處無令近道出西城門  
天化作死人扶輦出城室家隨車啼哭呼天  
奈何捨我求為別離太子問曰此為何等僕  
言死人何等為死答言死者盡也精神去矣  
四大欲散鬼神不安風去息絕火滅身冷風

先火次鬼靈去矣身體挺直無所復知旬日

之間肉壞血流胘爛臭無一可取身中有

蟲蟲還食之筋脉爛盡骨節解散觸體異處

脊脅肩臂髀脛足指各自異處飛鳥走獸競

來食之天龍鬼神帝王人民貧富貴賤無免

此患太子長歎而說頌曰

觀見老病死 太子心長嘆 人生無常在

吾身亦當然 是身為死物 精神無形法

假令死復生 罪福不敗亡 終始非一世

從癡愛久長 自此受苦樂 身死神不喪

非空非海中 非入山石間 無有地方所  
脫止不受死

於是太子迴車還宮愍念衆生有老病死苦  
惱大患愁思不食王問其僕太子出遊寧有  
樂乎即答王言逢見死人遂致不樂數年小  
差復欲遊觀嚴駕出北城門天復化作沙門  
法服持鉢行步安詳目不離前太子問曰此  
爲何人其僕答曰沙門也何等爲沙門蓋聞  
沙門之爲道也捨家妻子捐棄愛欲斷絕六  
情守戒無爲得一心者則萬邪滅矣一心之

道謂之羅漢羅漢者真人也聲色不能汙榮  
位不能屈難動如地已免憂苦存亡自在太  
子曰善哉惟是爲快即說偈言

痛哉有此苦 生老病死患 精神還入罪  
經歷諸勤苦 今當滅諸苦 生老病死除

不復與愛會 永今得滅度

於是太子即迴車還憂思不食王問其僕太  
子又出意豈樂乎僕言行見沙門倍更憂思  
不饗飲食王聞大怒舉手自擊前勅修道復  
令太子出輒見不祥罪應刑戮即召羣臣各

使建議設何方術當今太子不出學道有一臣言宜令太子監農種植役其意思使不念道便以農器犁牛作具僕從小吏相率上田令監課之太子坐閭浮樹下見耕者墾壤出蟲天復化令牛領興壤蟲下淋落鳥隨啄吞又作蝦蟇追食曲鱣蛇從穴出吞食蝦蟇孔雀飛下啄吞其蛇倉鷹飛來搏取孔雀鷗鷺復來搏撮食之菩薩見此衆生品類展轉相吞慈心愍傷即於樹下得第一禪日光赫弈樹爲曲枝隨蔭其軀王念太子常在宮中未

曾執苦即問其僕太子何如對言今在閭浮樹下一心禪定王曰吾令監作欲亂其思然故禪定在家何異王勅嚴駕便往迎之遙見太子樹枝曲蔭神曜非常不識下馬爲作禮時即與俱還未及城門無數千人華香奉迎相師一切稱壽無量王問何故梵志答言明旦日出七寶當至王大歡喜必成聖主出家品第五

是時太子還宮思惟念道清淨不宜在家當處山林研精行禪至年十九四月七日誓欲

出家至夜半後明星出時諸天側塞虛空勸  
 太子去時裘夷見五夢即便驚覺太子問之  
 何故驚寤對曰向者夢中見須彌山崩月明  
 落地珠光忽滅頭髻墮地人奪我蓋是故驚  
 覺菩薩心念此五夢者應吾身耳念當出家  
 告裘夷言須彌不崩月明續照珠光不滅頭  
 髻不落傘蓋今在且自安寐莫憂失蓋於是  
 諸天言太子當去恐作稽留召烏蘇慢此言  
 此言 踏神  
 適來入宮國內默寐時難提和羅化諸宮殿  
 盡為塚墓裘夷妓女皆成死人骨節解散髑

髑異處胙脹爛臭青瘀膿血流漫相屬太子  
 觀視宮殿悉作塚墓鷄鶻狐狸豺狼鳥獸飛  
 走其間太子觀見一切所有如幻如化如夢  
 如響皆悉歸空而愚者保之即呼車匿急令  
 鞍馬車匿言天尚未曉鞍馬何疾太子即為  
 車匿而說偈言  
 今我不樂世 車匿莫稽留 使我本願成  
 除汝三世苦  
 於是車匿即行鞍馬馬便跳踉不可得近還  
 白太子馬今不可得鞍菩薩自往拊拍馬背

而說頌曰

在於生死久 騎乘絕於今 蹇特送我出  
得道不忘汝

於是鞞馬訖蹇特自念言今當足蹋地感動  
中外人四神接舉足令脚不著地馬時復欲  
鳴使聲遠近聞天便散馬聲皆令入虛空太  
子即上馬出行詣城門諸天龍神釋梵四天  
皆悉導從蓋於虛空時城門神人現稽首言  
迦維羅衛國天下最為中豐樂人民安何故  
捨之去

太子以偈答言

生死為久長 精神經五道 使我本願成  
當開泥洹門

於是城門自然便開出門飛去天曉行四百  
八十里到阿奴摩國此言太子下馬解身寶  
衣瓔珞寶冠及二盡與闍特告言汝便牽馬歸上  
謝大王及國羣臣闍特言今當隨從供給所  
須不可獨還放馬令去山中多有毒蟲虎狼  
師子誰當供養飲食水漿牀臥之具當何從  
得要當隨從與并身命蹇特長跪淚出舐足

見水不飲得草不食鳴啼流涕徘徊不去太  
寸復說偈言

身強得病摧 氣盛老至衰 死亡生別離

云何樂世間

於是闡特悲泣禮足牽馬辭還未至國城四  
十里外白馬悲鳴其聲徹國中國中皆云太  
子來還舉國人民絡繹出迎但見車匿牽馬  
空還裘夷見此自投殿下抱馬歔歔淚下交  
橫王見裘夷泣五內皆摧傷自抑告言曰吾  
子學自然國中人民見王及裘夷哽噎悲泣

莫不為摧傷裘夷日夜思王便召羣臣吾有  
一太子捨我而入山卿曹相差次令數滿五  
人共追侍太子慎勿中來還太子得離俗踊  
躍欣喜安徐步行入城國人覩太子歡喜無  
有馱太子離息愛遠諸苦惱根思欲剃頭髮  
倉卒無有具帝釋持刀來天神受髮去遂復  
前行國中人民隨而觀之於是出國小復前  
行到摩竭國從右門入左門出國中人民男  
女大小見太子者或言天人或言帝釋梵天  
神龍王歡喜踊躍不知何神太子知其所念

便下道坐樹下人民圍繞歡喜觀視時國王  
萍沙即問臣吏國中何以寂默了無音聲對  
曰朝有道士經國過去光相威儀非世所有  
國人大小追出而觀于今未還於是王與羣  
臣出詣道士遙見太子光相殊妙便問太子  
是何神乎太子答言吾非神也若非神者從  
何國來何所姓族太子報言吾出香山之東  
雪山之北國名迦維父名白淨母名摩耶萍  
沙問言將無悉達乎答言是也驚起禮足太  
子生多奇異形相炳著當君四天下為轉輪

聖王四海顛顛冀神寶至何棄天位自投山  
藪必有異見願聞其志太子答言以吾所見  
天地人物出生有死劇痛有四老病死苦不  
可得離身為苦器憂畏無量若在尊寵則有  
憍逸貪求快意天下被患此吾所厭故欲入  
山諸者長曰夫老病死自世之常何獨預憂  
乃棄美號隱遁潛居以勞其形不亦難耶於  
是太子即說頌言

如今人在胎不為不淨  
如今在淨不為不淨汗

如今苦不為多無有數  
假令如是誰不樂世間  
如今人老形不若干變  
如今善行者不為惡行  
如今愛別離不為苦痛  
假令如是誰不樂世間  
如今病瘦無復有大畏  
如今後世無有諸惡對  
如今墮地獄無有苦痛  
假令如是誰不樂世間

如今年少形不變壞者  
如今所不可不以著心  
如今死至時無有眾畏  
假令如是誰不樂世間  
如今愚癡不以為厚冥  
如今瞋恚不為強怨家  
如今五樂心不為染汙  
假令如是誰不樂世者  
如今不與諸癡人共居  
如今眾癡法自遠離人

如今諸癡人無有思想  
假令如是誰不樂世者  
如今諸惡種不若干輩  
如今諸惡盡滅自離人  
如今諸惡念無有思想  
假令如是誰不樂世者尺二  
如今世間惡為最尊上  
如今惡行已滅不復生  
如今諸惡行盡無有實  
假令如是誰不樂世者

如今諸天食福常不動  
如今世人壽命常得存  
如今諸處所不為行趣  
假令如是誰不樂世者  
如今諸陰蓋不為怨家  
如今諸六入無有苦惱  
如今一切世間為不苦  
假令如是誰不樂世者  
於是太子言如諸君言不當預憂使我為王  
老到病至若當死時寧有代我受此厄者如

無有代胡可勿憂天下有慈父孝子愛徹骨  
髓至當死時不得相代若此偽身苦至之日  
雖居高位六親在側如爲盲人設燭何益於  
無眼者吾觀衆行一切無常皆化非真樂少  
苦多身非已有世間虛無難得久居物生有  
死事成有敗安則有危得則有亡萬物紛擾  
皆當歸空精神無形躁濁不明行致死生之  
厄非直一受而已也但爲貪愛蔽在癡網沒  
生死河莫之能覺故吾欲入山一心思四空  
淨度色滅恚斷求念空無所適莫是將返其

源而歸其本始出其根如我願得乃可大安  
萍沙王及諸耆長歡喜意解太子志妙世間  
難有必得佛道願先度我太子默然而逝復  
前念言今我入山當用寶衣爲世間癡愚人  
皆爲財所危即便見獵師驅遊被法衣太子  
喜念言此則真人衣度世慈悲服獵者何故  
著心念欲貿易成我志所願便持金縷衣買  
取法衣震越獵者內歡喜菩薩亦俱然太子  
被震越柔軟鮮且潔顧視僧伽梨遇佛無差  
別於是遂入山菩薩得法服欣喜光照耀山

林諸道士一名為阿蘭二名為迦蘭學來積  
年四禪具足獲致五通見光驚恠此何瑞應  
便共出觀遙見太子是為悉達今果出家善  
來悉達可坐是榻冷泉美果今可食之而作  
頌曰

日王初出時 在於山頂上 是故慧明照  
一切諸羣生 若有觀面像 緣意不知厭  
是故道德最 無雙無有比  
是時菩薩說頌言  
雖修四定意 不知無上慧 道心正為本

不在事邪神 行俗謂為真 長夜求梵天  
是故不識道 輪轉墮生死

六年勤苦品第六

於是菩薩行起慈心徧念衆生老耄專愚不  
免疾病死喪之痛欲令解脫以一其意而起  
悲心愍傷一切皆有飢渴寒暑得失罪咎艱  
難之患欲令安隱以一其意而起喜心念諸  
世間皆有憂苦恐怖遭逢之患欲令憺怕以  
一其意而起護心欲度五道八難衆生愚蔽  
朦闇不見正道念欲成濟使得無為以一其

意得善不喜逢惡不憂捨世八事利衰毀譽  
稱譏苦樂不以傾動成二禪行復前到斯那  
川其川平正多衆果樹處處有流泉浴池其  
中淨潔無有蚊蜂蝱蠅蚤川中道士名爲  
斯那教授弟子等五百人修其所術於是菩  
薩坐娑羅樹下便爲一切志求無上正真之  
道諸天奉甘露菩薩一不肯受自誓日食一  
麻一米以續精氣端坐六年形體羸瘦皮骨  
相連玄清靜寞寂默一心內思安般一數二  
隨三止四觀五還六淨遊志三四出十二門

無分散意神通妙達棄欲惡法無復五蓋不  
受五欲衆惡自滅念計分明思視無爲譬如  
健人得勝怨家意以清淨成三禪行天帝釋  
意念言菩薩坐樹下六年已滿形體羸瘦今  
當使世間人奉轉輪王食補六年之飢虛便  
感斯那二女使於夢中見天下盡成爲水中  
有一華七寶光色須臾便萎失其本色見有  
一人以水灑上更生如故水中衆華始生萌  
芽覆水如出二女夢寤恠未曾有即啓語父  
其父不解盡問耆年皆不能說天帝復下化

作梵志為女解夢言汝見天下水中生一華者是白淨王太子初生時今在樹下六年身羸形瘦是華萎時見一人水灑更生者是能獻食者小華萌芽欲出者是五道生死人也時天帝釋即說偈言

六年不傾倚

亦不念飢寒

精進無所著

形瘦皮骨連

汝等修敬意

奉獻於菩薩

現世獲大福

後世受果報

女言獻食者其法云何梵志答言當取五百牛乳展轉相飲至于一牛穀一牛糞持用作

糜乳糜涌沸出高十仞左上右下右上左下斟糜入鉢釜杓不汙二女恭肅奉獻菩薩菩薩意欲先沐浴然後受糜行詣流水側灑浴身形浴訖欲出水天神按樹枝二女奉乳糜得色氣力充呪願福無量令女歸三尊食畢洗手漱口澡鉢已還擲水中逆流未至七里天化作金翅鳥飛來捧鉢去并髮一處供養起塔即復前行當度尼連禪河是時菩薩便說偈言

度水尼連禪

慈愍一切人

五道三毒垢

使除如水淨 菩薩興是念 一切癡墮冥

當持八直水 洗除三毒垢 是時始上岸

青雀有五百 飛來繞菩薩 三市悲鳴去

於是復前行當過瞽龍池時龍大歡喜踊出

見菩薩便說偈言

善哉見悉達 來救何以晚 奉請一切衆

無上甘露漿 行步地震動 衆樂自然鳴

正與過佛等 於我無有疑 今持無上慧

降伏諸魔怨 今當佛日照 覺諸羣生眠

於是復前行望見蘇林山其地平正四望清

淨生草柔輦甘泉盈流華香茂潔中有一樹

高雅奇特枝枝相次葉葉相加華色蒼鬱如

天莊飾天旛在樹頂是則為元吉衆樹林中

王於是小前行見一刈草人菩薩便問曰今

汝名何等我名為吉祥今刈吉祥草今汝施

我草十方皆吉祥

時吉祥即說偈言

以棄聖王位 七寶玉女妻 金銀之牀榻

毳毼錦繡緜 鶡鴒鳥哀聲 八部真音響

超越過梵天 今用芻草為

菩薩以偈答曰

發願阿僧祇

欲度五道人

今往滿本願

是故欲得草

人與把亂草

便持向樹王

世間意皆亂

我當正其志

即持草布地

齊正如所言

菩薩便坐上

一切蒙其恩

菩薩作三要

正坐及其樹

若我不得道

終不離三誓

言我肌骨枯

不動會當成

過佛得道時

皆悉出一心

於是菩薩安坐入定棄苦樂意無憂喜想心

不依善亦不附惡正在其中如人沐浴淨潔

覆以白氈中外俱淨表裏無垢喘息自滅寂

然無變成四禪行已得定意不捨大悲智慧

方便究暢要妙通三十七道品之行何謂三

十七品一為四意止二為四意斷三為四神

足四為五根五為五力六為七覺意七為八

直行周而復始苦空非常無相無願我念世

間貪愛嗜欲墮生死苦少能自覺本從十二

因緣起何等為十二本從癡行便有識緣識

行便有名字從名字行便有六入緣六入行

便有更樂緣更樂行便有痛緣痛行便有愛

緣愛行便有取緣取行便有有緣有行便有  
 生緣生行便有老死憂悲苦痛心惱大患具  
 有精神從是轉墮生死欲得道者當斷貪愛  
 滅除情欲無為無起然則癡滅癡滅則行滅  
 行滅則識滅識滅則名字滅名字滅則六入  
 滅六入滅則更樂滅更樂滅則痛滅痛滅則  
 愛滅愛滅則取滅取滅則有滅有滅則生滅  
 生滅則老死憂悲苦痛心惱大患皆盡是謂  
 得道

降魔品第七

菩薩心自念言今當降魔官屬即放眉間毫  
 相光明感動魔官魔大惶怖心中不寧觀見  
 菩薩已在樹下清淨無欲精思不懈心中煩  
 毒飲食不甘妓樂不御念是道成必大勝我  
 欲及其未作佛壞其道意魔子須摩提此言  
 前諫父曰菩薩行淨三界無比以得自然神十五  
 通眾梵諸天億百皆往禮侍此非天人所當  
 沮壞無為與惡自毀其福魔王不聽召三玉  
 女一名恩愛二名常樂三名大樂父王莫憂  
 吾等自往壞菩薩道不足為勞父王勿復憂

念於是三女莊嚴天服從五百玉女到菩薩所彈琴歌頌姪欲之辭欲亂道意三女復言仁德至重諸天所敬應有供養故天獻我我等淨潔年在盛時願得晨起夜寐供侍左右菩薩答言汝宿有福受得天身不惟無常而作妖媚形體雖好而心不端譬如畫瓶中盛臭毒將以自壞有何等竒福難久居姪惡不善自亡其本福盡罪至墮三惡道受六畜形欲脫致難汝輩亂人道意不計非常經歷劫數展轉五道今汝曹等未離勤苦吾在世間

處處所生觀視老者如母中者如姊小者如妹諸姊各各還宮勿復作是曹事菩薩一言便成老母頭白齒落眼冥脊偃杖相扶而還魔見三女還皆成老母益大忿怒更召鬼神王合得十八億皆從天來下圍遶菩薩三十六由旬皆使變成師子熊羆兕虎象龍牛馬犬豕猴猿之形不可稱言虫頭人軀蛇之身龜龜之首而有六目或一頸而多頭齒牙爪距擔山吐火雷電四遶持戟矛菩薩慈心不怖一毛不動光顏益好鬼兵不

能得近魔王使前說偈問言菩薩慈心所問  
盡答曰

比丘何求坐樹下

樂於林藪毒獸間

雲起可畏窈冥冥

天魔圍遶不以驚

古有真道佛所行

恬憺為上除不明

其城最勝法滿藏

吾求斯坐決魔王

汝當作王轉金輪

七寶自至典四方

所受五欲最無比

斯處無道起入宮

吾覩欲盛吞火銅

棄國如唾無所貪

得王亦有老死憂

去此無利勿妄談

何安坐林如大語

委國財位守空閑

不見我興四部兵

象馬步兵十八億

已見猴獍師子面

虎兇毒蛇豕鬼形

皆持刀劍撲戈矛

超躍哮呼滿空中

設復億姦神武備

為魔如汝來會此

矢刃火攻如風雨

不先得佛終不起

魔有本願令我退

吾亦自誓不虛還

今汝福地何如佛

於是可知誰得勝

吾曾終身快布施

故與六天為魔王

比丘知我宿福行

自稱無量誰為證

昔吾行願從錠光  
 受拜為佛釋迦文  
 怒畏想盡故坐斯  
 意定必解壞汝軍  
 我所奉事諸佛多  
 財寶衣食常施人  
 仁戒積德厚於地  
 是以脫想無患難  
 菩薩即以智慧力  
 伸手接地是知我  
 應時普地尺二軒大動  
 魔與眷屬顛倒墮  
 魔王敗勳悵失利  
 昏迷却踞前畫地  
 其子又曉心乃寤  
 即時自歸前悔過  
 吾以不復用兵器  
 等行慈心却魔怨  
 世用兵器動人心  
 而我以等如衆生

若調象馬雖已調  
 然後故態會復生  
 若得最調如佛性  
 已如佛調無不仁  
 諸天見佛擒魔衆  
 忍調無想怨自降  
 諸天歡喜奉華臻  
 非法王壞法王勝  
 本從等意智慧力  
 慧能即時攘不祥  
 能使怨家為弟子  
 當禮四等道之證  
 面如滿月色從容  
 名聞十方德如山  
 求佛像貌難得比  
 當稽首斯度世仙  
 菩薩累劫清淨之行  
 至儒大慈道定自然  
 忍力降魔鬼兵退散  
 定意如故不以智慮  
 無憂

喜想是日夜半後得三術闍

三術闍者此言三神滿具足

漏盡結解自知本昔久所習行四神足念精進定欲定意定慧定得變化法所欲如意不復用思身能飛行能分一身作百作千至億萬無數復合為一能徹入地石壁皆過從一方現俯沒仰出譬如水波能身中出水火能履水行虛身不陷墜坐臥空中如飛鳥翔立能及天手捫日月欲身平立至梵自在眼徹視耳洞聽意預知諸天人龍鬼神蚊行蠕動之類身行口言心所念悉見聞知諸有貪姪

無貪姪者有瞋怒無瞋怒者有愚癡無愚癡

者有愛欲無愛欲者有大志行無大志行者

有內外行無內外行者有念善不念善者有

一心無一心者有解脫意無解脫意者一切

悉知菩薩觀天上人中地獄畜生鬼神五道

先世父母兄弟妻子中外姓字十八一一分別一

世十世百千萬億無數世事至于天地一劫

崩壞空荒之時一劫始成人物興時能知十

劫百劫至千萬億無數劫中內外姓字衣食

苦樂壽命長短死此生彼展轉所趣從上頭

始諸所更身生長老終形色好醜賢愚苦樂一切三界皆分別知見人鬼神各自隨行生五道中或墮地獄或墮畜生或作鬼神或生天上或入人形有生豪貴富樂家者有生卑鄙貧賤家者知衆生或五陰自弊一色像二痛癢三思想四行作五寃識皆習五欲眼貪色耳貪聲鼻貪香舌貪味身貪細滑牽於愛欲或於財色思望安樂從是生諸惡本從惡致苦能斷愛習不隨姪心大如毛髮受行八道則衆苦滅譬如無薪亦無火是謂無爲度

世之道菩薩自知已棄惡本無姪怒癡生死已盡五陰諸種悉斷無餘栽藥所作已成智慧已了明星出時廓然大悟得無上正真道爲最正覺得佛十八法有十神力四無所畏佛十八法者謂從得佛至于泥洹又二一無失道二無空言三無妄志四無不靜意十九五無若干想六無不省視七志欲無減八精進無減九定意無減十智慧無減十一解脫無減十二度知見無減十三古世之事悉知見十四來世之事悉知見十五今世之事悉知見十六

攬衆身行化以始所知十七攬衆言行化以始所知十八攬衆意行化以始所知是爲佛十八不共之法十神力者佛悉知見深微隱遠是處非處明審如有一力也佛悉明知來今往古所造行地其受報處二力也佛悉分別天人衆生彼彼異念三力也佛知衆生若干種語及度世語四力也佛悉了知世間雜種無量情態五力也佛能現禪解脫定行除衆勞諍六力也佛知欲縛知欲解要在所宜行七力也佛智如海善言無量追識一切宿

命所更八力也佛天眼淨見人物死神所出生善惡殃福隨行受報九力也佛漏已盡無復縛著神真獻智自知見證究暢道行可作能作無餘生死其智明審是爲佛十神力也四無所畏者佛神智正覺無所不知愚人惑言佛不悉知至於梵魔衆聖皆莫能論佛之智故獨步不懼一無畏也佛漏盡悉止愚惑相言佛漏未盡至梵魔衆聖莫能論佛之志故獨步不懼二無畏也佛說經戒天下誦習愚惑相言佛經可遏至梵魔衆聖莫能論毀

佛之正經故獨步不懼三無畏也佛現道義  
言真而要能度苦厄愚惑相言不能度苦至  
梵魔衆聖莫能論佛正道故周行不懼四無  
畏也佛得是意一切智見坐自念言是實微  
妙難知難明甚難得也高而無上廣不可極  
淵而無下深不可測大包天地細入無間養  
育衆生如視赤子承事諸佛積德無量累劫  
勤苦不亡其功今悉得之喜自頌曰  
作福之報快 衆願皆得成 速疾入衆寂  
皆得至泥洹 今覺佛極尊 棄姪淨無漏

一切能將導 從者必歡喜

是時佛在摩竭提界善勝道場貝多樹下德  
力降魔覺慧神靜三達無礙度二賈客提謂  
波利授三自歸及與五戒爲清信士念昔錠  
光別我爲佛汝後百劫當得作佛名釋迦文  
如來至真等正覺明行足爲善逝世間解無  
上士道法御天人師號佛世尊度脫衆生如  
我今也吾從是來建立弘誓奉行六度四等  
四恩三十七品善權隨時一切諸法積累不  
倦高行殊異忍苦無量功報不遺大願果成

